

بيتنا القديم



جذوره حالفه ميت يمين

لتفضل حاضنه الذكريات

تبكي علي كل اللي مات

بحق خيط العنكبوت

وكل شق من الشقوق

ماتفتح بابها للي باع

واللي رماها بطول دراع



بيتنا القديم شعره شاب

محتاج لحد يونسه

ويأسسه وينكسه

ريحة الدموع كاسياه غبار

حزين على عمره اللي غار

ترباسه حضن الصدا

كتفه اتخلع

خايف ليسكن فيه شبح

لو نملة عدت ع الحيطان

تهز أوتار المكان

الريح بيصرخ

مش لاقى حد يكلمه

برواز قديم شايلى تراب

لصوره ليها الف عام

تحكى عن الماضي

مرتاحه ونايمة ف الوسع

محتاجه يزورها القمر

وكف يزيل عنها التعب

وفرن شبعانه بعجين

كانت بتخبز للولد



وجره مليانه بحنين

شربت من مر العطش

سرير جريد صفر

ضلوعه م التعب

راح الولد واللي ولد

وبيتنا نسيه الزمن

اتهد حيله وانقلب

